

聖旨

敷奏卷十

雜

希陳情乞恩分豁減革軍功以圖補報事

照得文武官品級服色不同故百戶以上初陞者職

皆有署總旗小旗不離軍後非有官秩故初加者後

皆無署載在會典係是舊例成化十六年安米住以

小旗功陞署一級本部明白議擬係官者陞署係軍

人小旗該陞署一級者俱陞實授總小旗正與會典

所載舊例相合近因安欽襲職本部查得安欽父安

寧即安米住歷陞功次查照新例內小旗陞署一級

不該陞實授總旗及將試百戶并遇例實授百戶共



二級俱革去止與總旗以此安欽不服累行奏辯緣  
軍人小旗不陞署職係是舊例成化十六年本部明  
白擬陞具題非是錯悞况查各項題稿事例相同一  
旦無故減革有失人心合無將安欽父安寧遇例實  
授百戶一級革去與襲試百戶仍以總旗食糧今後  
但係先年本部擬陞已定職級不必牽引新例追其  
既往一槩減革正德十年五月初五日具題奉  
聖旨是安欽准襲試百戶欽此

為舉異才明法令以備邊禦虜事

看得給事中徐之鸞所奏大意謂近年巡邊憲臣不  
得其職連心持祿掣肘養奸以致邊備廢弛夷狄為  
患要令大臣科道官各舉所知奇材異識簡其尤者  
三二員授以相應憲職領

勅分道而出經畧邊務明年以後近者秋出春歸遠  
者在彼住劄各歲報行過事件以驗其賢勞而覈其  
虛實無非欲任人脩舉邊備之意但所奏經畧事宜  
俱係各邊巡撫都御史當行之事其見任巡撫都御  
史俱係吏部推舉才望相應任用之人各係在廷大  
臣奉

勅分道而出各管一鎮整飭邊備贊畫軍務責任已



專委託已重行之年久規制已定今若又用憲臣三  
二員前去經畧歲以為常誠恐政出多門人難遵守  
係干事體重大臣等擅難改議合無乞

勅遼東薊州宣府大同三關陝西延綏寧夏甘肅各  
巡撫都御史將給事中徐之鸞所奏經略事宜逐一  
脩舉申明法令禁治貪殘務便邊徭一新宿弊盡革  
夷虜不敢侵犯內地藉以輯寧斯稱委任各將行過  
事蹟回奏查考如或因循顧忌事無成效聽本部并  
科道官糾劾罷回另舉奇才異識官員前去更替其  
巡撫都御史稱職者務照給事中任忠近日題准事

例久任責成不許數為更易其舉異才一節本部仍  
咨吏部覆奏定奪正德十年十一月初八日具題奉  
聖旨是欽此

為清時弊以蘇民困事

看得南京工科給事中殷雲霄所言賦繁役重民不  
聊生思欲變通以拯其弊誠為有識之論但中間事  
干規制難擅定奪今將所言開立前件議擬明白伏乞  
聖裁正德十一年五月十七日具題奉  
聖旨是欽此

一曰脩武備前件查得問刑條例內一款軍職



晉書卷之四  
三  
賣放并後占軍人二罪俱發其賣放已至十  
名以上後占不及數者依賣放甚者事例罷  
職克軍後占已至十名以上賣放不及數者  
依後占甚者事例減降三級賣放後占俱至  
十名以上者從重發落不及十名者併數通  
論降級後占軍人五名又占餘丁十名及包  
納月錢滿貫者從重降級發立功滿日照所  
降品級於原衛所帶俸差操又一件各衛所  
管軍人等將關出官軍糧料布花等物若指  
以公用差使為由因而侵欺糧料一百石大

布一百匹綿花一百斤錢帛等物直銀三十  
兩以上者問擬如律軍職立功五年滿日降  
一級帶俸差操旗軍人等枷號一箇月發極  
邊墩臺守哨滿日疎放又查得本部題准事  
例天下軍官應襲舍人有衛學處入衛學無  
衛學處附入儒學俱照京學事例責以課程  
一體考較係兩直隸者聽提學監察御史係  
十三都司者聽提學按察司官比照在京則  
例考試量為賞罰年終造冊繳部以憑查照  
其父祖年老病故等項本舍即該起送者亦



要照例送學作養一年之後俟其略知文義  
粗能書寫方許具結保送襲替文理不通者  
不准保送俱係見行事例但奉行未至故弊  
未能除今給事中殷雲霄奏言武略廢弛由  
於役占數多征科太橫而養之無道操練不  
時器械不精而教之無法指陳事蹟切中時  
弊又以興革利弊惟在得人故欲每省設一  
憲臣專領其事亦為有見但一省地方廣濶  
非一人所能兼理見今各省設有按察司官  
分巡并直隸地方俱設有都御史巡撫御史

巡按若每省又添一憲臣專領武備一事切  
恐總理之名既於巡撫嫌於相同分理之任  
又於分巡疑於掣肘况係干官制本部擅難  
議擬合無通行各處巡撫巡按三司官查照  
舊例痛革前弊鎮守等官後占科害軍人者  
務要訪察禁治指實劾奏仍委用賢能官管  
軍如法操練應襲子孫選送入學照例考試  
量為賞罰務臻實効毋事虛文  
為軍職給憑事

查得會典一書專以



太祖高皇帝欽定諸司職掌為主類以頒降群書附以歷年事例皆不失乎

皇祖之意備載

御製序文伏讀可知今會典書內明開兵部職掌將引選過官員抄榜給憑定限到任仍行該府轉行所在衛所催任繳憑等因係是諸司職掌原文並無刪改其兵科項下開稱凡兵部選過官員赴任俱先赴本科畫字其文憑定限給付乃是附以事例纂集之言不係原定

制書亦無明開本科官定限給付字樣若以此為據文憑由本科定限則亦由本科給付矣其文憑年八月尚未用印亦未押字豈得便給付乎况自正德十一年八月以前兵部選官給憑經由本部并該科官數多俱是兵科標點僉日本部用印定限給付衆所知實非近年更變舛錯近於本年八月內兵科將選過軍職周隆等文憑定限不僉日該吏領出本部不敢擅便依從僉日仍送兵科僉日訖並無差官傳語到科聽從定限却又阻抑情由後康英等文憑一十道兵科又止定限不行僉日臣等為照此等事體俱係諸司職掌定制遠年相傳舊規一旦將文憑改



在本部僉日該科定限不行奏請恐有違碍以此備  
查明白具題節奉

欽依還照舊例行已行欽遵外今兵科具題前因緣  
軍職文憑係遵諸司職掌定制遠年相傳舊規不係  
因襲近日事例臣等仍難擅便改議至於六科事例  
各有不同俱年遠相傳舊規似難比照合無遵奉前  
旨將軍職文憑仍照本年八月以前舊例兵科探點  
僉日領回本部定限印押給付施行正德十一年十  
一月十七日具題奉

聖旨是今後軍職文憑兵科還照舊僉日本部定限

給付欽此

為武舉事

臣等竊聞書云無稽之言勿聽弗詢之謀勿庸又云  
事不師古以克永世乃罔攸聞正德二年先任本部  
尚書劉宇等所議武舉條格非有不備乃因求備致  
未穩當若遵

詔書事例中間豈無應從查革改正者而因襲未改  
臣等深懼謬陋不可傳後所以奏乞儒臣查議蓋以  
大禮制度非綿蕞野外之人所能講定也今奉  
聖諭命臣等議處緣武舉係干制度本部不敢專擅



合無本部考據前代武舉制度并查本

朝節年奏行武舉事例逐一明白各開前件會集多  
官計議應行應革緣由定擬條格會奏取自

上裁又恐各官會議一時不得盡言合無通行各衙  
門大小官員但有所見並聽直陳事理奏下本部參  
酌會議庶事不苟簡理無遺漏正德十二年七月初

三日具題奉

聖旨是這武舉條格比先議有未當相應查革改正  
的恁部裏還隨宜議處了來說欽此

為武舉事

查得今次各處起送應舉官生人等共八百七名內  
遼東二百三十七名其餘各有二三員者有全無者  
多寡不均四月初九日試馬上箭每人走馬三四射  
九矢共該走馬二千四百餘回共射七千二百餘矢  
本日射必不周又於初十日試馬上箭一日方畢若  
遇風雨又難拘日期若不照鄉試事例酌量地方南  
北定數起送不惟地方取人有偏抑恐以後人漸加  
多難於較射况武舉之設重在騎射或有馬上中九  
箭步下中四箭以上者因論策不稱不蒙收錄監生  
省祭官生員等項已有出身正途又似武舉中式仍



送吏部選用未免紊亂選法舊例軍職官非親冒矢石獲有軍功者不陞今以從容較射偶中數矢輒陞二級一級似失之易千戶以下官員徒在取中支米之列終無出身効用之路其得陞試署鎮撫知事終身支米亦無可用又文武科舉自有不同今武舉既倣文舉會試殿試事例刊錄文字其馬步數目不載錄內亦似欠缺既稱答策論三道馬上中四箭步下又中二箭以上者陞署職二級答策論三道馬上中三箭步下又中一箭以上者陞署職一級則是專以騎射為重又稱所答策論叅以弓馬俱優者列為上

等弓馬稍次者列為中等則是又以策論為主以致主司難於去取前項事件俱未穩當臣等議得漢制武舉皆起布衣至唐開科亦有定議我

太祖高皇帝初定天下召集海內名儒酌古準今議定制度文職設科貢二途以取士武職世襲故不設科然又設流官五府都督及方面都指揮俱不世襲以待有功及賢能者陞用各衛指揮千百戶五年一次考選委用蓋於世襲之中而寓選舉之意則武舉之制已在其中矣天順間始議武舉成化弘治以來間一舉行猶取騎射大略而已至正德三年尚書劉



宇議定今行條格三年一次舉行著為定例中間條格如前項所查既不取法于古又不合宜于時規制苟且事體乖謬誠未穩當臣等先已查奏不係洪武永樂年間舊例應否舉行不敢擅議奉  
欽依照例行今若不備陳議處誠恐紊亂  
舊章取譏後世伏望

皇上念

祖宗制度係干重事非劉宇與臣等孤陋寡聞之人所可更定遂足以為遵守乞

勅翰林院儒臣考據古今詳度事理如果舉用將材  
祇應遵照舊例於武職中推舉考選賢能之人及於  
功陞官內酌量推用則武舉一科不必另設若世襲  
武職之外恐有遺材則參酌古今定立武舉制度務  
在事必師古不礙今制將前項見行條格未穩事件  
逐一改擬停當開陳明白徑自具奉本部會集多官  
再議上請定奪其以前武舉中式官生人等內都指  
揮果有行檢材能者照例推用千百戶鎮撫總小旗  
及舍人軍餘所陞試署職級內有情願赴各邊總兵  
等官處報効殺賊者在京者具告本部在外者具告  
該管官司轉行本部各送所告地方總兵等官處參



隨殺賊該支米石就於彼處查照支給仍聽巡按御史查點不許寄帶空名冒支食米其生員民庶人等所陞試所鎮撫知事及試巡檢聽該管上司就委本處府州縣衛所專管巡捕如有犯罪依律問革正德十二年六月十九日具題奉  
聖旨是今後武舉還照舊舉行其間事宜有未備的  
恁部裏還議處了來說欽此

### 為武舉事

會同太傅定國公徐光祚等以保無太子太保吏部尚書陸完等議得兵部考據前代武舉制度并

本朝節年奏行武舉事例俱已明白中間應行應革緣由定擬條格視前頗為穩當但係議處武舉事例臣等俱未敢擅擬伏乞

聖明裁定正德十三年八月十五日具題奉

聖旨是翰林院考驗官臨時再奏請定奪其餘都依擬行欽此

### 計開

一每遇子午卯酉年十月武舉鄉試預先於九月內各衛所起送都司府州縣起送布政司類送巡按御史會同三司官考驗定數仍行



都司起送兵部兩京衛所俱送中軍都督府  
候到齊之日本府掌印官會同各都督府并  
錦衣衛各掌印官考驗定數類送兵部直隸  
衛所留守司大寧萬全都司并各府州縣俱  
各送巡按御史考驗定數仍行各都司直隸  
府州縣衛所照例起送其十月內考驗日期  
并選取之法一倣武舉會試例行

一武舉天下軍職兩京武學并各衛所各起送  
五十名南北直隸衛所各起送三十名大寧  
都司并中都留守司各起送十名遼東萬全

二都司并山西行都司各起送三十名陝西  
都司起送五十名陝西行都司山西山東河  
南浙江江西湖廣四川廣東廣西雲南各都  
司各起送二十名福建貴州各都司各起送  
十五名湖廣四川福建各行都司各起送十  
名總小旗舍人舍餘軍餘兩京武學并各衛  
所及陝西都司各起送二十名南北二直隸  
衛所遼東萬全二都司山西行都司各起送  
十名大寧都司中都留守司山西山東河南  
浙江江西湖廣四川福建廣東廣西雲南貴



州各都司并陝西湖廣四川福建各行都司各起送五名民人南北二直隸各起送二十名每布政司各起送十名以上起送人員雖有定額若堪應舉者少儘數起送不拘定額但不許有過原額

一每遇辰戌丑未年四月兵部於團營教場內會集考驗初九日試馬上箭十二日試步下箭十五日試策一道內閣大學士兵部尚書為考驗官提督各營官兵部左右侍郎錦衣衛官二員給事中二員為同考驗官監察御

史二員為監試官其餘執事官俱各照例定擬

一武舉會試中選每科照正德三年例取中選武官舍人共六十名官照品級為次序舍人序於見任武職之後外取中選總小旗舍餘民人不拘名數不得過二十名

一各處起送應武舉之人務要詢訪素無過犯操行端謹言貌出眾膂力過人及考驗弓馬熟閑答策通曉兵法者各開註明白方許以禮起送不許求足額數一槩濫舉



一選取之法凡有五等以原報考語行檢實跡優劣叙為一等又以言貌膂力優劣叙為一等又以馬上中箭多寡叙為一等又以步下中前多寡叙為一等又以答策優劣叙為一等五等俱在前列者取在中式之列或行檢才識高絕而膂力騎射未稱或膂力過人騎射精熟而答策未稱或精通韜畧而中箭數少聽考驗官公同各官通融參酌優劣定擬去留

一團營考試畢四月十六日公定去取十七日

早兵部門前掛榜十八日引赴

御前叩頭當日中軍都督府赴宴十九日早謝

恩其武舉錄待開榜畢日刊印進呈中選官舍人等前三名列策三道其武舉錄武兵部臨時再擬停當具奏定奪

一武舉中選官員除都指揮使難以加陞外其都指揮同知都指揮僉事指揮使指揮同知及指揮僉事正副千戶俱陞署一級遇有推用指揮使同知僉事俱加署都指揮僉事職銜其武舉中選之人臨用所陞官職俱由武



舉而陞止終本身子孫並不得襲

一武舉中式官員舊例常俸外上等給米三石中等給米二石有違

太祖高皇帝欽定額制今議中選武職於已定俸給該支折色米內准改五石支本色

一中選武職屬都司行都司者遇有本都司官員缺及本都司地方備倭守備把總運糧等項員缺屬兩京衛所者遇有南北直隸地方都司留守司官員缺及備倭守備把總運糧等項員缺本部俱照陞定職事挨次推用或

相兼未中選曾經奏保者共舉二員照例請旨簡用本地方見有武舉中選官員不得於別官內推舉其各衛所軍政掌印僉書管屯巡捕等項遇有員缺亦於武舉中選官內各照陞定職事推用

一中式總小旗舍餘軍餘兩京及各邊鎮者俱委管隊在外者各於本衛所委管守城操練巡捕等項民人委管本州縣民壯俱與冠帶榮身總小旗俱准支本色米舍餘軍餘民人俱月支米一石以後立有軍功照例陞用



一中式應襲舍人俱待襲替後推用職銜照舊  
加陞

為議處功級以一法例事

參照各項事例原非

祖宗舊制俱係近年更定事件中間不免偏廢之失  
如署職之與實授獲功則異而止與實授則同舍人  
之與千百戶納銀則一而至於加陞各異遇例者既  
已革其實授而又併革其全級犯堂者既已革充總  
旗而又遞減其軍功是皆輕重失宜委於事體不當  
相應議處合無今後軍民舍人餘丁人等獲功一級

者與做小旗二級者與做總旗間有納銀冠帶者照  
舊榮身三級與做所鎮撫四級與做實授百戶其總  
旗功陞署職者與做試所鎮撫試所鎮撫功陞實授  
一級者與做試百戶及試署職後功陞署級者止與  
實授其功陞實授一級者准於實授之外加陞署職  
一級內署百戶原係總旗功陞署職再獲軍功署級  
者止陞所鎮撫如係所鎮撫功陞署職再獲軍功署  
級者與做實授百戶及軍職署職遇例實授之後又  
獲功陞署職者襲替之日革去遇例級數再加所獲  
署級功次准與實授如獲功陞實授一級者革去遇



例級數准於實授之外加陞者職及犯堂革旗之人如親祖父立有軍功者一體於總旗上照級加陞其試署職銜例前陞授者不必更改有具奏者俱不准理犯堂及遇例實授先已減革者待後子孫襲替一體扣筭施行庶法例適中人心允服正德十二年十二月十七日具題奉  
聖旨不必更張只照舊欽此

為輯人心以安地方以圖長治事

看得兵科給事中許復禮因福建福州等衛軍人倡亂之後推言和人心以圖長治乞要該部計議轉行

各該鎮巡等衙門將軍衛有司之弊一一查處裁革不急之工役無名之歲辦非分之科擾當減免者量為減免當釐革者悉與釐革等因引用經旨反覆論辯雖若泛言實閔治道考之前代漢文帝與民休息而天下治安漢武帝窮兵黷武而海內虛耗末年遂有輪臺之悔封田千秋為富民侯今天下民窮財盡賦繁役重而軍官方且扣除貧軍月糧民官逼取貧民財賄盜賊隨捕隨發不畏法度視死如歸皆因官吏虐害人不聊生以致然也萬一遠近俱困盜賊蜂起土崩之勢變生倉卒兵財兩竭計無所施臣等平



時既不能表率諸司及言官論列又不能申明法禁  
誤國之罪萬死莫贖伏望

聖明俯念軍民窮困已極先當寬其差徭急宜禁止  
科害納許復禮私憂過計之言特降

勅旨通行天下鎮巡等官今後務要撫恤軍民各令  
得所非奉

朝廷明文一夫不許擅用一錢不許擅科敢有違者  
聽巡撫都御史巡按御史并按察司官指實劾奏處  
以重罪但係犯贓官吏務要依法究治不許似常姑  
息庶幾可收人心盜賊衰息四方寧謐正德十三年

九月十六日具題奉

聖旨是寬差徭禁科害等項事情便通行與各處鎮  
巡等官知道欽此

為整應兵以制黠虜抑貪功以撫疲民事

看得兵科左給事中徐之鸞等所奏大意謂北方之  
達賊當勦南方之蠻賊當撫陝西因無提督以致達  
賊侵犯臨鞏地方宣大總兵官朱振杭雄俱韜略不  
足要設謀略具備大將一員往來提督及要將見問  
犯人陳九疇赦其罪復其任及稱南方巡撫惟利加  
官廢子之榮不顧荼毒生靈之禍南方巡按惟存陞



級超用之望絕無裁抑僥倖之心要將原與馬吳官  
廕追奪及行南方巡撫都御史今後地方弗靖務官  
曲為撫處果係勢犯大順方許用兵并行南方巡按  
御史今後非奉

旨紀驗功次不許奏捷希圖陞賞所言無非欲慎重  
爵賞懲戒貪功妄殺之意不為無見但臣等竊議北  
虜自來為中國患非兵力所能馴服漢高帝滅強秦  
驅除群盜平定天下不能免匈奴白登之圍後與匈  
奴和親方得息兵自漢以後中國分裂五胡亂華以  
至遼金迄於胡元遂移宋祚奄有萬方賴我

聖祖神宗始能驅逐腥羶光復華夏近年北虜漸強  
擁衆數萬連年入寇調兵防禦月無虛日加以內地  
饑饉民困轉輸流徙日甚賑救無策今年陝西防禦  
虜患事宜已該本部於去年十月節次申明律例請  
勅各該鎮巡官遇有警報雖非統屬許其依律互相  
徵調相機策應柰何延綏騎兵不過二萬有奇寧夏  
騎兵不滿二萬陝西趙文所統固原騎兵不及五千  
臨邊之地東西相望三千餘里前項各鎮軍馬分散  
按伏勢孤援寡不得聚集一處及定邊營花馬池等  
處虜賊出入之地素無糧草積蓄所調客兵不能久



留寧夏鎮巡官王時中安國等陝西鎮巡官鄭陽趙文等懼有失事自春以來整搦軍馬極力防禦戰無虛月屢奏兵糧缺乏事下戶部無計區畫本部議奏掣回甘涼備禦官軍三千以為趙文之助亦難別處達賊因見固原一帶有備偵知臨鞏地方空虛擁衆數萬直入搶掠得利而還趙文路瑛等方能邀截奪獲被虜人畜且賊既深入搶掠陝西各鎮守臣難謂無罪但虜衆我寡勢不相敵非因提督無人自分彼此以致然也近年都御史叢蘭總制宣府太同寧武等關三邊鄧璋總制延綏寧夏甘肅三邊調度由於

一人各鎮不分彼此山西則虜寇越過寧武等關逼近太原

晉王奏警陝西則虜寇越過固原深入隴州

韓王告急由此觀之虜之深入固不在於總制無人也為今之計若非輕徭薄賦愛養民力固邦本以制四夷修內治以攘外患乃不較賊勢強弱數易將官增兵添戍加賦遠輸遣將出師不惜勞費誠恐外患未除而內變將作雖有智者不能善其後矣且本朝故事沿邊各鎮俱設主將掛印充總兵官專主關外征伐之事若賊勢衆大本鎮兵馬不能支持方



議

命將亦充總兵官別統官軍前去會合所在總兵官協力殺賊如用文臣加以叅贊及提督軍務名目用內臣加以監督軍務名目事寧即回未聞平時用武職大臣充總兵官又提督各鎮總兵官者也今欲再用總兵官一員提督宣大二鎮總兵官朱振杭雄又用郤永充總兵官提督甘肅總兵官柳湧俱領客兵前去各鎮見之糧草何以供應若只令二將獨往緣軍無二帥以一鎮之軍稟受二將之令以主將受主將之節制體統一或乖宜軍機必致掣肘非細故也

及查見監犯人陳九疇原任肅州兵備副使專一分理肅州地方以撫御番夷為職先該肅州寄住哈密衛夷人米兒馬黑麻賚奏赴京直入長安門伸訴九疇打死伊父都督失拜烟荅抄沒家財等項事情見該法司會官審問外其土魯番因彼送回金印不與賞賜拘執夷使火者散者兒等不見放回節次接遞番文要來犯邊及有附近肅州屬番節次走報土魯番夷已過哈密搶殺瓜州赤斤柴城兒等處漸近肅州九疇非不預知却乃故不依律呈請鎮巡官添調人馬早為設備十一月十一日總兵官史鏞差人肅



州爪探九疇回稱肅州素無糧草甘州軍馬且不必動至十五日賊已進嘉峪關方報史鏞十七日始到甘州以致土魯番賊攻陷城堡殺虜軍民數以萬計揆之法律九疇啓釁失機豈得無罪復何冤枉至其以夷攻夷之說止據番人綽骨之言事在夷方將何憑信今欲將九疇免罪并欲復其官職國典具存實難輕貸及查南方湖廣雲南福建江西四川兩廣等處各種猺獞苗蠻等賊先年遇有侵凌

朝廷即命公侯伯都督等官佩征夷將軍印統領京營官軍征討正統年間鄧茂七葉宗留等賊在於福

### 建浙江地方作亂

朝廷亦命侯伯都督等官統軍出剿未聞以南方之賊威不必加專事招撫亦不聞待其勢犯大順然後用兵者也正德五六年間中原盜起初事招撫尋復悖叛主招撫者

朝廷罪之山東等處則都御史馬中錫被收死於獄中四川則高崇熙逮繫斃於道路江西則吳廷舉銳意招降祭賊首胡浩三之墓至遣義男吳吉為賊之婿後賊復叛劫殺方面等官廷舉遭劾僥倖得免其後四川竟調廷綏官軍江西調遼東官軍山東等處



調宣大等處邊軍遠出征剿逾年始平供軍之費以億萬計皆因撲滅不早始事招降以致滋蔓難圖耳近於正德十一年間巡撫四川都御史馬昊等奏稱棘人雖邊夷種類其間如阿田阿羅阿尚等皆筠高等縣版籍編民始與流民有隙爭擾不聽撫處攻圍邊堡戕殺戍軍劫掠燒燬無所忌憚今欲急於進剿恐濫及無辜必傷和氣又恐諸夷煽動兵連禍結不可輕舉自取損威奏要再加撫處若果聽從直宜隨俗處分如執迷不返方可調兵進剿該本部議奏務要先行設法撫處如果向化不必進剿復該馬昊等

安撫不從將棘蠻普法惡等擒斬降散盡絕紀功御史熊相紀驗造冊奏稱四川流賊甫平棘蠻突起於非絕之於萌芽未必不缺夫戕斧今不及一年遂平劇賊實由馬昊身自撫師筭無遺策近該巡按四川御史盧雍亦奏馬昊征剿棘蠻一事為功之魁及杏松潘番賊近年不時侵犯殺虜人民守邊官員俱被叅提監問重罪地方見今不安馬昊會同鎮巡三司官議奏調兵防剿本部已經議擬覆奏請勅賚捧前去欽遵行事今要追奪馬昊前與官廕以為貪功生事之戒但查四川原奏捷音內稱棘蠻普



法惡初起捏造妖言統領蠻衆殺死民人羅三祭旗  
及殺死採木湯照磨男湯文宗等攻圍南溪宜賓富  
順青神等縣燒燬居民房屋殺虜男婦三百餘名各  
該官司報知馬昊等差旗軍呂明等賫執火牌招降  
三次不服方議進剿緣南溪宜賓富順青神等縣俱  
係中國縣治普法惡等肆行燒劫向使馬昊坐視不  
理玩寇殃民罪又難逃

朝廷比照近年斬獲四川殘賊廖麻子事例加官陞  
予似不為過况

成命已下難以追奪及查近年貴州香爐山湖廣柳

桂兩廣府江江西南贛福建汀漳等處猺獠苗蠻等  
賊攻圍城堡阻截道路殺害官吏劫掠人民招撫既  
不聽從遠近深被其害

朝廷切責鎮巡等官欲治其罪特

勅各官速為征剿授以方略專其委任又蒙

勅旨戒諭惟務殲其渠魁不許妄殺良善各該巡撫  
都御史鄒文盛奏金王守仁等恪遵

成命調度有方兵不踰時遂報寧謐

朝廷論功行賞以報勞勩竊恐鄒文盛等原無希賞  
之心又如往年都督陳友因征銅鼓五開苗賊封武



平伯平江伯陳豫因征鄧茂七等賊封平江侯文官  
如尚書王驥征麓川封靖遠伯他如侍郎等官侯璉  
白圭程信項忠等非止一人皆因征南功蹟膺子加  
秩未必因征北虜及征南方犯順之賊然後陞賞也  
近年都御史彭澤等因征內地流賊亦各加官膺子  
不聞論列今鄒文盛等不煩

朝廷遣將出師就彼剿平大盜加官膺子出自  
朝廷恐不為過及查先年紀功官員隨軍殺賊臨危  
蹈險親冒矢石所以論功必加錄用近年剿殺內地  
流賊紀功官皆不隨軍所殺者多脅從之人非蠻夷

此各官坐紀籍冊又多容冒濫給事中王萱吳玉榮  
黎奭俱陞通政司叅議御史吳堂陞大理寺寺丞亦  
未聞有論其過者今御史周文光之在貴州王度之  
在湖廣謝天錫之在廣西屠僑之在江西毛鳳之在  
廣東皆奉

勅紀功中間多深入賊巢親臨戰陣秉公既多勦勞  
特甚

朝廷雖有恩旨尚未陞用若以為各官惟存陞級  
用之望絕無裁抑僥倖之心亦恐非周文光等之本  
心也至如御史毛鳳初至廣東見賊猖獗其時總兵



巡撫等官俱新任未到毛鳳奉

勅紀功即會鎮守太監及三司官調度兵糧剿平大盜奏報捷音乃其職任當然亦非希圖陞賞臣等竊慮即今四夷不靖中原水旱相仍民窮財盡人心思亂盜賊四起所在官司因循玩愒不肯任怨早為計處遂至煩兵費財公私俱困而後已又觀前代姦人以鼠竊狗偷為不足慮以山東盜起謂無能為卒之釀成大患至亂天下可勝嘆哉臣等深鑒其弊申明律禁痛懲欺隱啓釁失事者執法叅究玩寇殃民者必加罪罰仰賴

聖明俯賜采納任之不疑是以南方劇寇以次削平其餘盜賊隨起隨滅今臣等若懷顧忌而務雷同一如議者之言使各該巡撫巡按官皆避貪功之嫌為姑息之計弛已振之紀綱廢已修之武備盜賊無忌嘯聚千萬如近年劉六劉七等之亂夫豈

國家之利哉合無本部行文宣府大同山西各鎮巡官撫恤軍士及時操練如遇今冬河凍虜衆過河水行預為設備相機戰守候明年夏秋草長勢將深入之時加謹隄備若果虜衆我寡則固守城堡勿或被其掩襲或用火器出奇攻擊或以步兵力戰拒敵務



在計出萬全保無一失仍須嚴謹哨探料敵先知果將深入則火速奏聞區處不許遲誤本部仍行提督團營內外官候明年春暖即早議奏挑選人馬定委將官關領賞賜器械遇有警報照例請

勅將官掛印充總兵官統領官軍出關會合各鎮官軍併力截殺仍行戶部差官供給軍餉俱事寧回京若所在將官遇賊衆寡相敵任意逗遛退縮或承調違期不至失誤軍機俱依律治以重罪再行各該巡撫巡按三司等官今後所在草寇竊發及各邊寨苗夷侵犯州縣殺害人民務要依律火速申奏量調官

軍乘機剿捕不許隱蔽坐視以致滋蔓難圖及因而失誤軍機如或故違究問明白依律坐斬決不輕貸若一應邊夷本不犯邊貪功生事妄殺啓釁聽巡按御史糾奏亦治重罪正德十三年十一月十五日具題未奉

旨

為申明禁例以杜倖濫事

看得兵科左給事中徐之鸞等題稱各該將官違例奏帶人員冒濫陞官及併功併廕等項冗食萬員大壞名器乞要本部通行查出叅奏行令各該衙門裁



革改正以復舊規仍申明舊例今後再有如前陳乞  
違例之人嚴加究治一節查得自正德五年以來山  
東河南四川江西等處流賊作亂官軍征剿奏帶人  
多紀驗造冊照例擬陞又併功累陞遂致冗濫弊端  
一開末流難塞今左給事中徐之鸞等舉以為言臣  
等職典武銓因循踵襲實難辭責合無本部通將近  
年奏帶陞職人員查開明白具奏應存應革伏乞  
上裁定奪仍通行各處鎮守分守守備等官各將原  
奏帶人員照例存留五名三名應用其餘盡數發回  
各原衛所供職着後凡遇軍功紀功御史務要查勘

真實方許紀驗不許似前一槩紀錄在冊以致將來  
冒濫無有紀極自貽後患今後奏帶有功人員除千  
戶以下照例擬陞但係指揮以上即係領軍官員所  
斬首級雖造在冊俱遵舊例不許擬陞其因奏帶所  
陞官員止許累陞至二級而止不許累陞都督都指  
揮流官重職致傷名器伏乞

聖明俯念爵賞重事特

賜允行永為遵守不勝幸甚正德十三年十二月二  
十六日具題奉

聖旨已有旨了欽此



為發明律例以便征戰事

看得給事中傅鑰所奏例不合律以致將官顧忌畏怯不肯殺賊援古証今欲會法司重為議擬一節深為有理合無依其所奏本部會同刑部都察院大理寺各堂上官查議明白奏請定奪奉

聖旨是欽此臣等會同太子少保刑部尚書張子麟等查議得先為陳愚悃飭邊備以防虜患事該監督軍務御馬監太監張忠題一件合無行令各邊主將一面時常選差的當人員遠出境外分番爪探賊營何徃定止一面嚴督沿邊哨守人役一遇有警烽砲

分明人知趨避兵知趨戰務在料敵先知功可期成若將領怯懦無益邊備撫按官員即時劾奏速為易置若敵退大眾縱有損傷亦須不拘事例論功分豁等因該兵部會官議得依擬其言敵退大眾縱有損傷亦須不拘事例論功分豁一節切緣各邊失事固由於將領之怯懦亦由將官恐損官軍不敢敵戰所致太監張忠此議尤為有見合無今後出兵果係奮勇迎敵但有追逐擒斬之功者官軍陣亡俱不以損折官軍論若係輕率寡謀被其襲誘追殺敗散損折者仍依律例治罪不准分豁等因正德十一年十一



月初九日會題本月十一日節奉

聖旨是欽此又為陳言邊務預防虜患事該巡撫大同都御史胡璣巡按御史賈啓會奏一件原情罪以責戰守照得大同三路將官則有總副叅遊之名所領人馬則有奇遊與援之號數多三千員名俱係各城挑選精銳而守備官操守止餘老家守城官軍七八十人或百十餘人其兵力之強弱責任之重輕不待臣言可知矣邇因虜衆在邊各將領俱調發各城按伏戰守守備官即其所統進止機宜皆不得預及至失事將官得罪反輕守備反重此人心所以不平

而將領得以推奸避事也合無着該部查擬除臨陣與賊交鋒對敵失機照依該部奏行事例問擬外其被賊入境搶虜人畜行勘是實若係本城住有將領畏縮不行截殺問擬守備不設充軍罪名取自上裁本城守備官止擬不應從重照常發落如是賊勢不重守備官不能嚴謹烽堠及將領於別城住劄一時赴援不及守備官失於飛報以致深入搶虜人畜者照舊問擬守備不設將領則從輕叅究發落庶情法允當而責任專一矣該兵部議得守邊將帥守備不設計為賊所掩襲攻陷城寨或被賊入境搶虜



人民俱有

太祖高皇帝欽定律條擅難異議但中間有守備已  
設計本城堡原設軍馬數少可固守城堡不可輕  
出禦敵以致地方被搶其情與守備該設計而故不  
設計者委有不同問刑衙門不論有無計策可設一  
向俱引前律問擬充軍又因事出不測或所搶人畜  
數少參稱律重情輕奏請俱免充軍降級發落依律  
言之雖似減輕以情原之猶似過重所以都御史胡  
瓚等奏要將各城堡軍少守備官被賊入境搶虜人  
畜者止擬不應從重照常發落不為無見但賊勢重

大非守備官軍所能支持者問擬不應猶似虧枉倘  
賊少勢輕可備而不備被其搶虜者止問不應發落  
不無以後守備官員益加玩忽廢弛邊備合無通行  
各邊巡撫巡按問刑衙門今後各城堡守備等官可  
以設計而故不設計致有失事俱依律問擬不許寬  
縱內有事出不測及失事數少情輕律重者仍照例  
奏請定奪若本城堡原有人馬數少賊勢重大力不  
能支止可固守及瞭高守哨并徵調隣境兵馬等項  
俱無失悞別無計策可設地方雖被搶掠力量不能  
支持係干律內該載不盡事理參詳明白引律比附



具奏從法司再行議擬奏請定奪其調來各城堡按  
伏住劄將領往來不常違期畏縮失誤軍機自有本  
律難問守備不設充軍罪名等因正德十二年五月  
二十四日具題本月二十六日奉  
聖旨是胡瓚所陳邊務事宜恁每既逐一查議明白  
都着依擬行欽此又查得

大明律內一款凡守邊將帥被賊攻圍城寨不行固  
守而輒棄去及守備不設計為賊所掩襲因而失陷  
城寨者斬若與賊臨境其望高巡哨之人失於飛報  
以致陷城損軍者亦斬若被賊侵入境內虜掠人民

者杖一百發邊遠充軍問刑條例內一款失候軍機  
除律有正條者議擬監候奏請外若是賊擁大眾入  
寇官軍卒遇交鋒損傷被虜數十人之上不曾虜去  
大眾或被賊白晝晝夜突入境內搶掠頭畜衣糧數  
多不曾殺虜軍民者俱問守備不設被賊侵入境內  
虜掠人民本律發邊遠充軍若是交鋒入境損傷虜  
殺四五人搶去頭畜衣糧不多者亦問前罪數內情  
輕律重有碍發落者仍備由奏請處置伏覲  
大明律內凡守邊將帥被賊攻圍城寨不行固守而  
輒棄去及守備不設計為賊所掩襲因而失陷城寨



晉書卷之四十四  
者斬若與賊臨境其望高巡哨之人失於飛報以致  
陷城損軍者亦斬蓋棄城不守及可設計而故不設  
計并責專望高巡哨而失於飛報以致陷城損軍罪  
坐所由故皆處斬若故不設計被賊侵入境內虜掠  
人民比之失陷城寨其情頗輕故坐以杖一百發邊  
遠充軍原情定罪誠萬世不刊之典也若既與賊為  
隣不能保其必不入境既與賊交鋒不能保其必不  
損傷故律無守邊將帥致賊入境及臨陣損傷官軍  
治罪之條後因問刑條例開載賊衆入寇官軍交鋒  
損傷被虜數十人之上及搶掠頭畜衣糧數多不曾

殺虜軍民俱問守備不設之罪以此問刑衙門將臨  
陣對敵損傷官軍者俱問充軍降級罪名實是有乖  
律意前項兵部先已會官議擬題准今後果係奮勇  
迎敵官軍陣亡俱不以損折官軍論通行外但在外  
問刑衙門仍拘條例問擬多不遵依今給事中傅鑰  
又以無言考據精切議擬明白深合

祖宗制律之本意必須再行申明改正廢使各邊將  
領多於戰鬪無所顧忌合無通行內外問刑衙門今  
後守邊將帥失誤軍機除律有正條外若賊寇入境  
彼此衆寡相當堪以出戰將官故不設備閉門不出



被虜人民者依律問發邊遠充軍若虜衆兵寡勢難  
抵敵止可固守不可輕出致彼搶掠人民者查勘其  
實奏請定奪若止是搶掠牲畜不曾虜掠人民或殺  
虜沿邊哨探軍人及沿邊採打柴草軍民不係境內  
人民者俱坐以應得罪名不許引用被賊入境虜掠  
人民律條致失輕重及望高守哨之人失於飛報必  
致不備損折官軍者律無正條引律比附奏請定奪  
律以致損折官軍者律無正條引律比附奏請定奪  
若奮勇迎敵殺敗虜賊雖是斬獲賊級數少官軍  
亡數多仍須論功陞賞不許擇引律內損軍律

擬治罪前項問刑條例與律意不合者革去不用正  
德十四年四月初九日具題奉

聖旨是這會議事情明白詳盡深合律意都依擬行  
還通行與內外問刑衙門知道欽此

為乞恩廕以圖補報事

看得兵科叅論太監張得玉等乞恩陞官太多太倉  
米少要本部查例酌處上請定奪一節本部查無事  
例合無行查數內果係已故司禮監太監鄧敏親屬  
量准外其餘不係親屬之人俱各照舊仍通行禁約  
以後不許違例奏乞自取罪愆正德十四年六月二



十二日具題奉

聖旨朕憂念舊臣已都陞用了你每如何一槩奏革  
本當查究且饒這遭欽此

晉溪本兵數奏卷十四終

晉溪本兵數奏跋

正德末年四方多事時王恭  
襄公受

簡命主本兵當權倖充斥人心波  
靡之日獨能內據忠赤外竭  
勤勞毅然以輔翊匡持之力  
任諸已於其職之當行而變



折頹廢者必倡率而振起之  
或牖納巷遇於

上以成其志或拔茅推轂於下以  
終其道不矯亢以干時名而  
艱貞微宛以卒收忠濟之益  
一時軍民蠻貊莫不拱手以  
尊

朝廷上自藩鎮下而郡邑節鉞將  
帥之臣以及抱關執戟之士  
莫不俛首恪遵

王度而不敢紊故

鑿輿屢出而

宗社宴然北虜之疆一遭挫衄遂  
遁伏而不敢南嚮者終公在



位之日至若閩廣湖蜀江浙  
之區深巖大箐保險聚徒之  
寇屢攻而不破及有司畏難  
苟且欺蔽而不以聞者公籌  
畫於內不動聲色皆次第削  
平之其著者若宸濠之戡定  
吐蕃之皈降功存

社稷嗚呼偉矣公雖橫雁聲望愈  
隆今

皇洞察誣妄旋與昭雪光復名位  
柄用未極而公告終

九重悼念忠賢每燕對廷臣輒興  
拊髀之嘆天下知公者感特  
觸事成願起公九京以圖治



理而不可得則相與求公遺  
稿思得考見安攘之迹謂高  
辱婚公門求者旁午而愧無  
以應也惟公踐敷中外垂五  
十年文章著述之外若諸司  
奏疏至不可勝載其曰本兵  
敷奏十四卷者則戎曹舊牘

也往歲屬司嘗刻棗於都下  
其未成者尚四卷且闕於校  
訂因未及傳嘉靖庚子高承  
乏秦藩斲材沂隴將刊補以  
成全帙而遄歸未果甲辰居  
太原東雩先生廖公方綜學  
政于吾邦崇正抑浮以身迪



于風教蓋慕公勤且久乃取  
京板以歸又取四卷者得高  
外舅內泉翁所校本託太守  
山泉江公以其俸刻之刻之  
工弗勞而成且亟則其端勤  
精練之餘惇厥盛美有足相  
成者耳工既訖謂高宜紀其

後蓋嘗讀公之說簡質嚴重  
無一冗語而意義炳然如指  
諸掌其與忠智不優而徒事  
詞藻者異矣然此特公政術  
之糟粕而當時

廟謨之密若論諫之大者尚多散  
逸不具於此又不能無遺情



馬惟慶是編之有傳仰二公  
之德義後將有取者庶乎高  
得藉此而應之也是歲十月  
既望

賜同進士出身陝西等處承宣布  
政使司左叅議寧化潘高謹  
書

